

दिनांक 13.08.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रधानमंत्री नरेन्द्र मोदी दौसा सड़क हादसा रे कारण मरण वालों रा पिरवार वालों ने 2-2 लाख अर जख्मी लोगों ने 50-50 हजार रुप्या री मदद देवण रो ऐलाण कीनो।
- नौजवानों ने नशा ऊं दूर राखण सारु नशा मुक्त भारत अभियान री पांचवीं वर्षगांठ रे मौके जागरूकता रा केर्इ कार्यक्रम।
- 79वां स्वतंत्रता दिवस समारोह री ज़ोरदार तैयारियां- काल विभाजन विभीषिका स्मृति दिवस रे मौके राज्य स्तर रो कार्यक्रम बीकानेर मांय।
- प्रदेश मांय घणखर ठोड़ा चौमासा री बिरखा रो जोर कम पड़बा ऊं उमस रो असर।

दौसा—मनोहरपुर सड़क हादसा रे कारण मरण वालों रा पिरवार वालों ने 2-2 लाख अर जख्मी लोगों ने 50-50 हजार रुप्या री मदद दी जावेला। प्रधानमंत्री नरेन्द्र मोदी हादसा माथे गहरो दुःख जताता थकां राष्ट्रीय राहत कोष ऊं आ रकम देवण रो ऐलाण कीनो है। राष्ट्रपति द्रौपदी मुर्मू अर केर्इ नेता दौसा—मनोहरपुर सड़क हादसा माथे गहरो दुःख जतायो है। राज्यपाल हरिभाऊ बागड़े, मुख्यमंत्री भजनलाल शर्मा अर विधानसभा अध्यक्ष वासुदेव देवनानी ई ई हादसा माथे शोक जताता थकां मरण वालों रा पिरवार वालों रे प्रति संवेदना जतायी। बासड़ी चौराहा कने आज तड़के एक पिकअप अर कंटेनर री टक्कर रे कारण व्हया हादसा मांय ग्यारह जणा री मौत व्हे ग्यी अर ग्यारह जणा जख्मी व्हे ग्या। हादसा मांय घणा ज़ख्मी आठ जणां ने जयपुर रा सवाई मानसिंह अस्पताल मांय भर्ती करायी ज्या है। हादसा रा शिकार लोग उत्तरप्रदेश रा एटा रा रेहवासी हा जो खाटूश्याम जी रा दर्शन कर र पाछा आ रहया हा।

दूजी कानी बीकानेर रा गजनेर हलका मांय इंदिरा गांधी नहर मांय डूब जावण ऊं तीन जणा री मौत व्हे ग्यी। पुलिस रे मुजब वे तीन ई जणा कोडमदेसर तळाव भैरुजी रा दर्शन करण सारु गया हा, जठे गेला मांय तळाव मांय डूब ग्या।

पाली रा गुढ़ा एंदला हलका रा कीरवा गांव मांय आज दो गाड़ियां री टक्कर रे कारण 40 जणा जख्मी व्हे ग्या, ज्यां रो गुढ़ा एंदला अर गुंदोज रा अस्पतालां मांय ईलाज कर्यो जा रह्यो है।

माय भारत अर स्कूल ऑफ अल्टीमेट लीडरशिप फाउंडेशन बीचे आज एक करार माथे सही करी ज्यी। युवा मामलात मंत्रालय री ई पहल रा तैत जाणकारियां साझा करण अर अगुवाई रो बूतो विकसित करण सारु काम कर्यो जावेला। आवता महीना देशभर मांय लागू व्हेवण वाळा ई समझौता रे जरिये 18 ऊं 29 साल ताई उम्र रा एक लाख नौजवानां ने लोकनीति, सामाजिक उद्यमिता, डिजिटल अर वित्तीय साक्षरता री सिखावण दी जावेला।

.....

जयपुर जिला प्रशासन 141 भूमिहीन सरकारी दफतरां, स्कूलां अर खेल मैदानां सारु 496 बीघा ऊं बत्ती ज़मीं आवंटित कीनी है। जयपुर विकास प्राधिकरण ने 835 बीघा ऊं बत्ती ज़मीं रा 99 आवंटन प्रस्ताव दिया ज्या है।

.....

सामाजिक न्याय अर अधिकारिता मंत्री डॉक्टर वीरेंद्र कुमार कहयो है के नशीली चीजां काम लेवण ऊं व्हेवण वाळी कमियां देश री सामाजिक बुनावट माथे गलत असर डाले है। वे आज नई दिल्ली मांय नशा मुक्त भारत अभियान री पांचवीं वर्षगांठ रे मौके राख्यी ज्या कार्यक्रम मांय बोल रहया हा। डॉ. वीरेन्द्र कुमार कहयो के नशो सामाजिक बुराई है अर इण ने जड़ खत्म करयो जावणो चाहिजे। वे नौजवानां ऊं नशीली चीजां ऊं दूर रेहवण अर दूजा ने ई दूर राखण री अपील कीनी।

.....

अजमेर मांय ई मौके राख्यी ज्या कार्यक्रम मांय लोगां ने नशो नी करण री सौगंध दिरायी ज्यी। बाड़मेर री स्कूलां मांय राख्यी ज्या कार्यक्रम मांय विद्यार्थी नशो नी करण री सौगंध लीनी।

.....

लेटिन अमेरिकी देशां ब्राजील, अर्जेंटीना अर मैक्रिसको समेत 12 देशां रा 24 कंटेंट क्रिएटर अर एन्प्लुएंसर रो दल चित्तौड़गढ़ रो दौरो कीनो। म्हाणा खबरनवीस बतायो के ओ दल चित्तौड़ रा किला री स्थापत्य कला अर राजस्थानी जीवनशैली री जाणकारी लीनी।

.....

राज्य पर्यावरण प्रभाव आकलन प्राधिकरण प्रदेश मांय उद्योगां री पर्यावरण मंजूरी ऊं जुड़ी पूछताछ सारु हेल्पलाइन सरु कीनी है। ई हेल्पलाइन रे जरिए लोग प्रस्ताव री स्थिति अर दूजी जाणकारियां ले सकेला।

.....

79वों स्वतंत्रता दिवस 15 अगस्त ने देशभर मांय उमाव सागे मणायो जावेला। स्वतंत्रता दिवस रे मौके प्रधानमंत्री नरेंद्र मोदी दिल्ली मांय लाल किला ऊं देश ने संबोधित करेला। ई राष्ट्रीय पर्व रे मौके दिल्ली मांय व्हेवण वाळा ज़ल्सा मांय शामिल व्हेवण सारु देशभर ऊं 210 पंचायत नेतावां ने खास पावणा रा तौर ऊं न्योतो दियो ज्यो है। आं मांय प्रदेश ऊं बाड़मेर रा सेड़वा हलका री नवातला,

बाखासर ग्राम पंचायत रा सरपंच भारथाराम सेवर अर वां री जोड़ायत खेतू देवी ई शामिल है। बुलावा माथे श्री सेवर खुशी ज़ाहिर करता थकां सरकार रो आभार जतायो।

जिला रा बाटाडू हलका री झाक गांव रा प्रगतिशील किसान डॉ. देवाराम पंवार अर वां री जोड़ायत ने ई स्वतंत्रता दिवस रा राष्ट्रीय ज़क्सा मांय न्यौतो दियो ज्यो है। वे परम्परागम अर औषधीय खेती-बाड़ी ने बधावो देवण अर उन्नत तरीका ऊं पशुपालन करण री उपलब्धि हासिल कीनी है।

जोधपुर मांय राख्या जावण वाळा राज्य स्तर रा स्वतंत्रता दिवस समारोह री सगळी तैयारियां आखिरी दौर मांय पूग ग्यी है। जोधपुर री संभागीय आयुक्त डॉ. प्रतिभा सिंह आं तैयारियां रो जायजो लीनो। बरकतुल्लाह स्टेडियम मांय व्हेवण वाळा ई ज़क्सा रो आज अभ्यास करी ज्यो।

काल विभाजन विभीषिका स्मृति दिवस रे मौके राज्य स्तर रो कार्यकम बीकानेर मांय राख्यो जावेला। कार्यकम मांय मुख्यमंत्री भजनलाल शर्मा ई शामिल व्हेला। विभाजन विभीषिका स्मृति दिवस रा सिलसिला मांय आज जयपुर रेलवे टेशन माथे चित्र प्रदर्शनी लगायी ज्यी। केन्द्रीय संचार ब्यूरो राजस्थान री अपर महानिदेशक ऋतु शुक्ला अर उत्तर-पश्चिम रेलवे रा जयपुर मंडल रा रेल प्रबंधक रवि जैन इण रो उद्घाटन कीनो। जोधपुर अर अजमेर रेलवे टेशनां माथे ई चित्र प्रदर्शनी लगायी ज्यी। केंद्र सरकार देश रा बंटवारा री दुःखद याद मांय साल 2021 मांय हर साल 14 अगस्त ने विभाजन विभीषिका स्मृति दिवस मनावण रो ऐलाण कीनो हो।

15 अगस्त ने मनाया जावण वाळा स्वतंत्रता दिवस ऊं पैली देशभर मांय जोर-शोर ऊं हर घर तिरंगा अभियान चलायो जा रह्यो है। गृह मंत्री अमित शाह आज नई दिल्ली मांय वां रा रेहवास माथे तिरंगो झण्डो फहरायो। मुख्यमंत्री भजनलाल शर्मा ई आज जयपुर मांय वां रा रेहवास माथे तिरंगो झण्डो फहरायो। ईं मौके वे बत्ती ऊं बत्ती जनता ऊं ई अभियान ऊं जुड़बा री अरज कीनी। मुख्यमंत्री रो काल बीकानेर रा नाल मांय निकाळी जावण वाळी तिरंगा यात्रा मांय शामिल व्हेवण रो कार्यकम है। इण ऊं पैली आज केंद्रीय मंत्री अर्जुनराम मेघवाल बीकानेर रा गंगा शहर मांय निकाळी ज्यी तिरंगा यात्रा मांय शामिल व्ह्या। जयपुर मांय केन्द्रीय संचार ब्यूरो अर वायु सेना टेशन री ओर ऊं जल महल री पाल ऊं आमेर महल तांई तिरंगा रैली निकाळी ज्यी। केन्द्रीय संचार ब्यूरो राजस्थान री अपर महानिदेशक ऋतु शुक्ला बतायो के मोटरसाइकिल रैली मांय लोग जोश अर ज़ज्बा सागे हिस्सो लीनो।

जयपुर वायुसेना टेशन रा ग्रुप कैप्टेन विनय भारद्वाज कह्यो के हर घर तिरंगा अभियान देशभवित रो जज्बो महसूस करावे है।

नागौर, सलूंबर, बाड़मेर, अलवर, कोटपूतली—बहरोड़, सवाईमाधोपुर बारां, पाली अर सिरोही समेत कई ठोड़ा निकाळी ज्यो तिरंगा रैलियां अर दूजा कार्यक्रमां मांय लोग उमाव सागे भाग लीना।

.....

कांग्रेस पार्टी री ओर ऊं आज जयपुर मांय प्रदेश कांग्रेस मुख्यालय ऊं शहीद स्मारक ताँई लोकतंत्र बचाओ पैदल मार्च निकाळी ज्यो। इण मांय प्रदेश कांग्रेस अध्यक्ष गोविंद सिंह डोटासरा, विधानसभा मांय विपख रा नेता ठीकाराम जूली, राज्य रा पैली वाढा मुख्यमंत्री अशोक गहलोत अर पैली वाढा उपमुख्यमंत्री सचिन पायलट समेत मोटी तादाद मांय कांग्रेस रा कार्यकर्ता शामिल व्हया।

.....

प्रदेश रा घणखर हलकां मांय फिलहाल चौमासा री बिरखा मंदी पड़ ग्यी है, ई कारण उमस अर गर्मी रो असर बध ग्यो है। श्रीगंगानगर मांय पारो 37 डिग्री सेल्सियस कने पूग ग्यो, हालांकि भरतपुर मांय आज सिज्यां हल्की बरसात व्हेवण ऊं उमस ऊं थोड़ी साता मिली। मौसम महकमो 15 अगस्त ऊं राज्य रा ऊगणी अर 16 अगस्त ऊं आतूणी हलका मांय बिरखा रे ओजू ज़ोर पकड़बा रा आसार जताया है।

.....